

Date – 18/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Dan lova Learners License leh Driving license pekchhuah chungchangah Mizoram sorkar Transport Dept chuan Aizawl Dist Transport Officer chu a hna atanga chawlh lailawk tir.
2. Chief Minister Pu Lalduhoman kumin September ni 1 atanga tuialhthei man tihsan chu tih danglam a ni lova, a ngai anga hman zui tur a ni a ti.
3. President Draupadi Murmu-i chuan Indi aleh Malawi te thawhdunna hrang hrang tihlenna turin kawng zau tak a inhawng a ti.
4. Sawrkar laipui chuan taksa tana tha tura buhfai tihdanglam iron fortified rice chu a him tawh tih a sawi.

<><><>

TRANSPORT DEPT

Dan lova Learners License leh Driving license pekchhuah kawngan Mizoram sorkar Transport Dept chuan Aizawl Dist Dist Transport Officer chu a hna atanga chawlh lailawk tir a ni a,

Suspend na order hi nimin khan Transport Dept chuan a tichhuak a, DTO Lalengthanga Hnamte chu a hna atanga chawlh lailawk tir a ni.

Puan tawh angin, Central YMA chuan dan hnuaia Learner leh Driving Licence nei theilo pe chhuak thintu mi thenkhatte leh District Transport Officer (DTO) a thawktute an chhui chhuak vek tawh an ti a.

Hei hi Transport Minister Pu Vanlalhlana hrilhin, tun hnai hun engemaw chen kalta atang khan, mi thenkhatte leh ralflan thenkhat ten Driving License awlsam taka an nei mai thei thin chu chhui chiangin, mi engemaw zat an kawm chiang a. Heta an thil hmuh chhuah chu, Mizoram mi leh sa dik tak zinga mi thenkhatte leh DTO a thawktute inthurualin, danin a phut anga Learner & Driving Licence nei thei tura lehkhaw pawimawh thil tel ngai nei lo te hnenah Learner & Driving Licence pekchhuah a ni ngei tih an finfiah thu an sawi a ni.

CYMA hruaitute chuan Learner & Driving Licence siam duh te chuan hetiang siam theia in sawi Commission ho hnenah document engmah pek ngai lovin an an inchhiar zat sum tam tham deuh zawk an pe a, an ni hian Aizawl DTO-a thawktute hnenah pawisa chawi ngai aia tam pe ve leh in, an lo siam sak thin a ni an ti a, hetiang pawn lam mi Learners leh Driving Licence siam sak thei tuten Department lama thawktute pawisa an pe tih finfiahna pawh Central YMA hruaitute hian Minister hi an hlan vek a ni.

Hetianga thil diklo ti thin DTO pisa chhunga thawktu te leh pawnlam atanga commission lo ti thin office lam thurualpui tu te hi Central YMA chuan an

hrechhuak vek tawh tih Minister hi an hrilh a. Mizoram khawpui ber, Aizawla DTO in hetiang an tih theih chuan District dangah pawh hlauhthawn an neih len viau thu Central YMA hruaitute hian an sawi bawk a ni.

Central YMA in hemi chungchanga hmalak sak tura Minister an ngenna lehkhah hian, a enkawl Transport Dept. hnuaia dik lo taka Learner & Driving Licence pekchhuaha inhnamnawihthe chu dan anga na taka hrem tur leh dan in a phut documents engmah nei lo leh Driving Test pawh paltlang miah lova,

Driving Licence pek chhuah mi engemawzat chu cancel leh sak tur leh, tun hnua hetiang a thlen tawh loh nana rang taka hmalaksak turin an ngen a ni.

CYMA hruaitute hian ruihhlo phur thin Maxi Cab leh Public Carrier te ruihhlo an phurh nen a man te chu an public carrier license cancel thin tur te leh hnamdang motor, state dang registration nei passenger phur tur nilovin Mizoram hmun hrang hrang passenger phura an flan thin chungchang te leh Lirthei neituten Garage nei vek tur anih chungchangah khauh zawk a kalpui tura ngenna an thlen tel bawk a ni.



CM

Chief Minister Pu Lalduhoman kumin September ni 1 atanga tuialhthei man tihsan chu tih danglam a ni lova, a ngai anga hman zui tur a ni a ti.

A kaihhruaia Council of Ministers thukhawmin petrol leh diesel man chungchang hi an ngaihtuah a, Chief Minister chuan tuialhthei man chungchang chu an vawithum ngaihtuahna anih tawh thu sawiin diesel chu VAT zaa 10-a tihsan a nih thu leh social infrastructure and services cess leh road maintenance cess cheng 2 ve ve lain tihian a hmaa cheng 80 leh pawisa 30 man chu cheng 87 pawisa 99 ah a chho ta a ti a, a punna chu cheng 7 leh pawisa 69 a ni a. Covid hri len hmain diesel man chu cheng 86 leh pawisa 37 a ni a, chumi aia tuna a man sanna chu litre khatah cheng 1 leh pawisa 62 chauh a ni a, a pung nasa lo a ni a ti.

Chief Minister chuan chhiah punna chhan chu mipuiten hria se a duh thu sawiin cess an lakna chu social infrastructure and services cess leh road maintenance cess a ni a. Social infrastructure and services cess chu thil pawimawh hrang hrang school tihchangtlunna turin zaa 25, hriselna leh damdawiin tihchangtlun nan zaa 25, thalai te tan skill development-ah zaa 25 leh a dang zaa 25 chu hmeichhia te chawikhanna pual project hrang hranga hman tur a nih dawn thu leh, a hlawkna teltu chu mipuite vek an nih dawn thu a sawi a. Cess dang, Road maintenance cess chu kawng enkawl na liau liau a hman tur a nih thu a sawi a. Sorkarin a tul ti a, mipuite tana hamthatna tur zawk a ni tia ruahmanna a siam chu mipui zawng zawng, pawl zawng zawngin pawmpui thei se tih an duh dan leh an ngenna a nih thu a sawi a ni.

ZPM in chhiah an tipung dawn lo ti a sawi anga an thang chu, anmahni puhchhiatna mai a ni tih Chief Minister hian a sawi bawk a, tawngkamin emaw ziakin chhiah pun loh tur thu hi an dah lo a ti a, chhiah pun loh tur an sawi chhun chu electric bill a ni a, hei erawh tihpun an tumlo a ti.

Hetihlai hian sorkar thutlukna ngaichang mektu NGO Coordination Committee leh Mizoram Commercial Vehicle Union hruaitute chuan sorkar thuchhuak hi ngaihtuahin an thukhawm ve leh dawn tih kan corr zawhna chhangin an sawi a ni.

Tuialhthei man sang duhlohna lantira, tihniam tura nawrtu Mizoram Commercial Vehicle Union hruaitute chuan NGO Coordination Committee in tuialhthei man tihniam tura an nawr ve tho avangin anmahni ngaichang tura an tih thu an sawi a. Hetianga sorkar thuchhuak a awm takah hian NGOCC te nena an la thutkhawm leh an beisei thu leh an thutkhawm hunah an kal zel dan tur chu an rel dawn thu an sawi a ni.

MCVU hruaitute chuan a bik takin, lirthei lian, truck te tana harsatna a len bik thu sawiin commercial vehicle dangte chuan STA dila an tlan man san mai thei an nih laiin truck te chuan FCI leh Food, Civil Supplies & Consumer Affairs -ah hun bi neia inremna lo ziak lawk vek tawh an ni a. An inremna chu tuialhthei man san hma rate mil vek a nih avangin truck neitu bik tan a harsa zual bik a ni an ti.



KALA UTSAV

State pum huap Hnam ziarang hmanga intihsiakna State Level Kala Utsav 2024 chu Chanmari YMA Hall, Aizawl-ah nimin khan huaihawt a ni.

He hun hmanpuitu State Project Director Pu Lalsangliana chuan Kala Utsav chu hnam ziarang pholanna a nih piah lamah hnam hrang hrangte inpumkhatna atan te, zirlaite inchherhriamna atan te a tangkai a ni a ti a. Kum danga National Level neihah Mizoram lawmman a lo lak nual tawh avangin kuminah pawh lawmman la thei ngei tura inbuatsaih turin zirlaite a chah a. Kala Utsav hlawhtling taka hman a nih theih nan Art & Culture Department leh Samagra Shiksha te an thawk dun thin chu lawmawm a tih thu a sawi a ni.

State Level Kala Utsav-ah hian category 6-ah zirlaite an intihsiak a, category tina pakhatna theuhte chu Mizoram aiawha National Level-a chhuak turte an ni.



MIZORAM LITERATURE FESTIVAL

Ni hnih aw h tur Mizoram Literature Festival chu nimin khan Aijal Club, Aizawlah tan a ni.

Mizoram Literature Festival Organising Chairman Pu Vanlalruata Ralte chuan Akashvani palai zawhna chhangin Mizoram Literature Festival chu a tum khatna a nih thu leh The Book Cafe, Aizawl leh Sahitya Academy tangkawp buatsaih a nih thu a sawi a. Pu Vanlalruata Ralte chuan India ramchhungah tawng avangin mihring an inthen hrang nasa hle tih sawiin chu inthenhranna, diversity chu mipuite thenhrangtu ni lo a, literature hmanga pawtkhawmtu a nih zawkna turin an duh thu a sawi a. Social media in zawimuangin ziak leh chhiar a rawn luahlan chho avangin lehkhabu chhiar lama phurna thar tuh an tum thu a sawi bawk a ni.

Mizoram Literature Festival huaihawt a nih theihna tura mi pawimawh hrang hrang hnenah lawmthu sawiin Pu Vanlalruata Ralte chuan Mizoram Literature Festival chuan nghawng tha tak nei se duh thu a sawi a. Zirlai tam tak, ti ve mai mai thin ten literature chu tuichilh tak tak se a duh thu sawiin literature chu ram hruaitu tha, mi fing siamtu a nih thu a sawi a. Ziakmi mai bakah lehkhabu chhiar thin lo pung se, mipuiten tan la thar leh se tih chu an duh ber a nih thu a sawi a ni.

Mizoram Literature Festival-ah hian ziaktu hrang hrang - Prof Joy LK Pachuau Jerry Pinto, Shynie Antony, Sanjoy Hazarika leh midangte an lokal a. India rama Dominican Republic Ambassador HE David Piug a tel A, Mizoram Literature Festival hawngtu tura beisei Chief Minister Pu Lalduhoma chu a remchan loh avangin a tel lo a ni.



AR

Assam Rifles Mizoram Range Serchhip Battalion chuan World Students Day pualin nimpiniah khan Champhai a Govt Kanan Middle School ah debate competition an buatsaih a, zirlaite kawng hrang hranga hmasawna tura buatsaih an nih thu an sawi.



CM

Chief Minister Pu Lalduhoma chuan a office-ah North East Frontier Railways (NFR) General Manager of Construction, Pu Arun Kumar Chaudhary a kawm a. Bairabi leh Sairang inkara rel kawng hna thawh mek a sawipui.

Chief Minister chuan, rail station approach road te chu a rang lama sial tura state sawrkarin hma a lak tur thu a lo hrilh a. Hmabak an neih hrang hrangte a lo zawt bawk. Rel a service theih hunah Mizo thalaite tana hna engemaw zat a awm theih a beisei thute pawh a lo hrilh a ni.

General Manager hian, nakum July ni 31 hmam kan hnate hi zawh hman kan tum a. Engemaw harsatna danglam bik a thleng a nih loh chuan an zo hman ngeiin an ring, a ti a. He rel kawng hian bungrua leh mihring phurh kualnaah awlsamna a thlen dawn bakah khualzin pawh a hip nasain an ring ni, a ti a. An hmalaknate hmuhpui turin Chief Minister hi a sawm bawk.



MZU VC VISIT SAITUAL

MZU Vice Chancellor Prof. Dibakar Chandra Deka an nimin khan Govt Saitual College a tlawh a, GSC Principal Pu Lalzarmawia leh thawktu ten lo dawngsawngin Principal room-ah inkhawmhona an nei.

MZU Vice Chancellor chuan Govt. Saitual College chu Aizawl khawpui pawn College a a tlawh hmasak ber a nih thu sawiin College dinmun leh an hmun hma chiang taka hriatte, zirtirtu leh zirlaite hmaichhana titipui a duh vangte a ni, a ti. Zirtirtute leh zirlaite chuan MZU tlawh thin mahse inhmuhna hun remchang a awm vek thin loh avangin amah zawkin hun remchang

insiamin a tlawh tih a sawi a. Vice Chancellor chuan GSC chu College lian tak ni lo mahse a hmun hma a thain a felfai a tih thu a sawi.

Prof. Dibakar Chandra Deba chuan zirna chungchang sawiin NEP an kalpui atangin nakum hi kum 3 an zirna leh graduate hun tur a ni tawh dawn a, NEP-in a duan anga kum 4 zir thei turin College chuan ruahmannna a nei em tih zawhna a nei tih a sawi a. NEP in a rua hman anga kum 4 chhung zir tur kalpui a nih theih chuan zirlai naupangin kum 1 chauh University an kal a ngai tawh dawn a, chu chu thingtlang leh chhungkaw harsa zawk atanga zirlaite tan malsawmna thlent u a nih theih tur thu a sawi. GSC chu Arts College chauh nilo Science streams hawn theih dan kawng an ngaihtuah ngai em tia zawtin theih tawp chhuaha hma la turin a chah a, zirnain hma a sawn zel theih thahnemngai taka thawk zel turin a chah bawk a ni.

MZU Vice Chancellor hi Prof Lalbiakdiki Hnamte CDC, Director MZU in a tawiam a, Govt. Saitual College a tlawh zawh hian Govt. Khawzawl College leh Govt. Champhai College te a tlawh leh dawn a ni.

<><><>

PRESIDENT

President Draupadi Murmu-i chuan Indi aleh Malawi te thawhdunna hrang hrang tihlenna turin kawng zau tak a inhawng a ti. India-Malawi Business Meet, Lilongwe-a neihah he thu hi sawiin Pi Murmu-i chuan agriculture, mining, energy leh tourism lama ram pahnih thawhdunnaah hmasawn theihna tam tak a awm thu a sawi. Puan tawh angin President Murmu-i hian nimin khan Malawi a thleng a. Ram pahnih inkar thil pawimawh tak tak ngaihtuahin an thukhawm dawn a, India mi chengte nen hun an hman dawn bawk a ni. President zin chungchanga kan correspondent report i lo ngaihtla ang u.

<><><>

NDA CM

Prime Minister Narendra Modi kaihhruaiin nimin khan NDA Chief Minister-te puala inhmukhawm Chandigarh ah buatsaih a ni a. BJP President JP Nadda, Defence Minister Rajnath Singh leh Union Home Minister Amit Shah te pawh he hunah hian an tel a. Inhmukhawmah hian ram hmasawna tur hrang hrang ngaihtuahho a ni a. Heng zingah hian Samvidhan Ka Amrut Mahotsav hman dan turte ngaihtuah a ni. Nimina NDA Chief Minister inhmukhawmah hian Chief Minister 17 leh Deputy Chief Minister 18 an tel a. BJP National President N P Nadda chuan tun tum hi Congress nilo sawrkar inhmukhawm niin party tin an tel tha a ti a. Resolution paruk an pass a ni a ti.

<><><>

FORTIFIED RICE

Sawrkar laipui chuan taksa tana tha tura buhfai tihdanglam iron fortified rice chu a him tawh tih a sawi. Union Ministry of Consumer Affairs, Food and Public Distribution chuan iron-fortified rice hian taksa tan thil tha lo a thlen lo a, science hmangin finfiah vek a ni tihi sawiin mipui tan hlauhthawn tur a awm lo a ti. Hei bakah hian Union Ministry chuan thisen natna Thalassemia leh Sick Cell anaemia nei tan pawh ei tam a hlauhawm lo tih a tarlang bawk a ni. Indian Council of Medical Research (ICMR) zirchianna behchhanin iron-fortified rice hian taksa tana hlauhawm a thlen lo tih a sawi a ni.